

WYNN ac OWEN (TEULUOEDD), Glyn (Cywarch), Sir Feirionnydd, a Brogyntyn Sir Amwythig.

Priododd EINION, a oedd yn fyw ar 16 Hydref 1380, ac yn disgyn yn bumed o [Osborn Wyddel](#) (ganwyd c. 1293), â Tanglwst, ferch [Rhydderch ap Ieuan Llwyd](#), Gogerddan, Sir Aberteifi. Dilynwyd ef gan IFAN (yn fyw 6 Hydref 1427), RHYS, ac IFAN (yn fyw 4 Mawrth 1513). Gwraig Ifan oedd Laurea, merch Richard Bamville, Wirral, sir Gaerlleon - y mae'n debyg iddynt briodi cyn 1 Hydref 1499 ac mai drwy'r briodas hon y daeth Ifan, a elwir weithiau yn IEUAN AP RHYS (yr oedd yn fyw yn 1513), yn berchen tiroedd y Glyn - ' had released to him certain lands which became part of Glyn estate which are stated to have been pledged by Richard Bamville ' medd [W.W.E. Wynne](#) yn *Pedigree of... Wynne of Peniarth* (London, 1872), gan ychwanegu ' Through his marriage, Glyn and much of the property in the parish of Llanvihangel [y Traethau], came into the family, but probably there was no mansion house at Glyn at so early a period.' Yr oedd JOHN ab IEUAN, aer y briodas uchod, yn fyw ar 27 Tachwedd 1545, ac yn byw yn Glyn. Mab iddo ef oedd ROBERT WYN ap JOHN (bu farw 1589) a briododd (yn 1544, o bosibl) Katherine, merch [Eliza Morris](#) (sef Ellis ap Maurice), Clenennau, Sir Gaernarfon, ac a ddaeth yn dad MAURICE AP ROBERT WYNNE (bu farw rhwng 9 Chwefror 1609/10 a 16 Ebrill 1610). Yr oedd yn siedwr Meirionnydd ar 19 Hydref 1604. Trwy ei ail wraig, Annes, merch Robert ap Richard, Llecheiddior, Sir Gaernarfon, cafodd WILLIAM WYNN (bu farw 1658), siryf Meirionnydd yn 1618 ac eilwaith yn 1637. Yn 1611 priododd ef, sef William Wynn, â Catherine (bu farw 23 Chwefror 1638/9), ferch [William Lewis Anwyl](#), Parc, Llanfrothen. Dyma'r William Wynn a adeiladodd (ailadeiladu) y Glyn presennol; am fanylion gweler erthygl gan yr arglwydd Harlech yn *Cylchgrawn Cymdeithas Hanes a Chofnodion Sir Feirionnydd*, i, 9-11. Aer William Wynn a Katherine (Anwyl) oedd ROBERT WYNN (bu farw 1670), Glyn ac Ystumcegid, siryf Meirionnydd yn 1655 a 1699. Ei wraig ef oedd Catherine (bu farw 1675), merch a chyd-aeres Robert Owen Ystumcegid; eu haer hwythau oedd OWEN WYNN (bu farw 1682/3), Glyn ac Ystumcegid, a briododd Elizabeth, merch ac aeres Robert Mostyn, Nant, Sir y Fflint. O'r briodas honno bu dwy ferch - (1) MARGARET (bu farw 1727), a briododd [Syr ROBERT OWEN](#) (bu farw 1698), Clenennau a Brogyntyn, Sir Amwythig, a fu'n aelod seneddol sir Feirionnydd, 1681-5, ac a etholwyd dros fwrdeisdrefi Caernarvon yn 1698 - yr oedd [Syr Robert Owen](#) yn yr i [Syr John Owen](#) (1600 - 1666), Clenennau, a fu'n ymladd ym mhlaidd Siarl I; a (2) Catherine, gwraig Peter Pennant, Bychtwn, Sir y Fflint. Yr oedd yr arglwyddes Margaret Owen a'i g r yn gydnabyddus ag [Ellis Wynne](#), awdur *Gweledigaethu, y Bardd Cwsc*, yntau hefyd yn llinach [Wyniaid](#) Glyn Cywarch. Ysgrifennodd [Ellis Wynne](#) at [Syr Robert Owen](#) ar 16 Medi 1697 yn erfyn ei gymorth i ddatrys problem ynghylch eiddo John Jones, Uwchlaw'r Coed, ewythr [Wynne](#), ac, ar 9 Tachwedd 1706, anfonodd lythyr at yr arglwyddes, a oedd bellach yn weddw, yn gofyn iddi hi a'i mab WILLIAM OWEN, adael i'r ysgrifennydd a'i blwyfolion ym mhlwyf Llandanwg gael yr hen Shire Hall yn Harlech i'w droi'n gapel anwes; y mae'r ddau lythyr yng nghasgliad Brogyntyn yn Llyfrgell Genedlaethol Cymru - gweler *Ellis Wynne: Dauganmlwyddiant*, a gyhoeddwyd gan y Llyfrgell yn 1934. Aer Syr Robert a'r arglwyddes oedd WILLIAM OWEN (bu farw 1768). Priododd ef â Mary, ferch Henry Godolphin, deon S. Paul's a phennaeth ('Provost') Eton - gweler llythyrau aelod o deulu Godolphin yn L.L.G.C., ac ymdriniaeth arnynt yn *Etoniana*, 1939. Gadawodd y ddau hyn ferch, MARGARET OWEN, a briododd Owen Ormsby (bu farw 1804), Willowbrook, swydd Sligo, Iwerddon, yntau, gyda llaw, yn fab i Margaret Wynn, a oedd yn un o ddisgynyddion teulu [Wynn](#) o Wydir. Merch i Margaret (Owen) ac Owen Ormsby oedd MARY JANE ORMSBY (bu farw 1869), aeres Glyn, Clenennau, a Brogyntyn. Ei phriod hi oedd William Gore (bu farw 1860), a'u haer hwy oedd JOHN RALPH ORMSBY -GORE (1816 - 1876), y barwn Harlech 1af (crewyd 11 Ionawr, 1876).

Awdur

Syr William Llewelyn Davies, (1887 - 1952)

Ffynonellau

At y cyfeiriadau a roddwyd eisoes ychwaneger J. E. Griffith, *Pedigrees of Anglesey and Carnarvonshire Families* (1914) Arglwydd Harlech, 'The Brogyntyn library of Printed Books,' yn *Cylchgrawn Llyfrgell Genedlaethol Cymru*, v, 165-74 am gyfeiriadau gan Phylipiadaid Ardudwy at rai o'r teulu gweler erthygl ar 'Phylipiadaid Ardudwy,' yn *Y Cymmrodor*, xlii

Darllen Pellach

Hilary Peters, [Cynnwys Glyn Cywarch](#), blog Llyfrgell Genedlaethol Cymru, 4 Mawrth 2019

Thomas Phillipp, [Manuscripts at Porkington, the seat of William Ormsby Gore Esq. near Oswestry, co. Salop](#) (Middle Hill Press 1830?)

Dyddiad cyhoeddi: 1953

Hawlfraint Erthygl: <http://rightsstatements.org/page/InC-RUU/1.0/>

Nghymru a thu hwnt.

Ewch i'n [tudalen codi arian](#) am ragor o wybodaeth.

